

Innaallagissamik pilersuinnermut atortunut atortunullu allanut atassusiinnermut malittarisassat aalajangersarneqarnerat pillugu Namminersornerullutik Oqartussat nalunaarutaat

Sanaartukkat innaallagissamut sakkortuumut atugassat atortullu innaallagiatortut pillugit Inatsisartut peqqussutaanni nr. 12-imi, 3. november 1994-imeersumi §§ 5, 6 aamma 20 naapertorlugit aalajangersarneqarput:

§ 1. Nalunaarummi pineqarpoq innaallagissamik atuisup pilersuinnermut atortuinik atortuinillu allanik innaallagissamik pilersuisup sarfamik sakkukitsumik pilersuiffianut atassusiisarneq pillugu teknikkikkut aalajangersakkanik aalajangersaaneq.

Imm. 2. Innaallagissamik pilersuisut tassaapput kikkulluunniit kikkunnut tamanut innaallagissamik pilersuinissamut akuersisummik pigisaqartut allatulluunniit akuerisaasut.

Imm. 3. Nalunaarut atuutinngilaq

1) sumiiffinni sakkutooqarnikkut siunertanut atorineqartuni, kiisalu

2) danskit-amerikarmiut sakkutooqarfini Kalaallit Nunaata illersorneqarnissaa pillugu isumaqatigiissut 27. august 1951-imeersoq naapertorlugu pilersinneqarsimasuni, taamaattoorli tak. Inatsimmi nr. 943-mi 23. december 1986-imeersumi § 9.

§ 2. Danmarkimi innaallagissiorfiit peqatigiiffiata, Danske Elværkers Foreningip, Ataatsimut malittarisassai qaquguluunniit atuuttut Nukissiorfiit taakkununga Tapiliussaata qaquguluunniit atuuttut ilanngullugit, innaallagissamik pilersuinnermut atortunut atortunullu allanut, innaallagissamik pilersuisup pilersuisoqarfianit pilersorneqaqqullugit kissaatigineqartunut, atassusiisarnissamut malittarisassanik aalajangersaaviusut, atorineqassapput.

§ 3. Ataatsimut malittarisassanik Tapiliussanillu § 2 taaneqartunik unioqqutitsinerit akiliisitaassutaasinnaapput.

§ 4. Ataatsimut malittarisassani Tapiliussanilu kissarussap allaanerunera pillugu aalajangersakkanik unioqqutitsisoqartillugu innaallagissamik pilersuisup aalajangersinnaavaa kWh atorinagu kVAh atorlugu atuineq akilerneqassasoq. kWh-mut aki atuuttoq naapertorlugu akiliisoqartassaaq.

§ 5. Nalunaarut atortuulissaaq 1. juli 1996.

Imm. 2. Tamanna peqatigalugu "Kalaallit Nunaanni innaallagissamut sakkortuumut atortut pillugit ataatsimut aalajangersakkat"-ni, atuakkaappaani, imm. A atorunnaarsinneqarpoq.

Namminersornerullutik Oqartussat, ulloq 11. juni 1996

Peter Grønvold Samuelsen

/

Hans Jakob Helms

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut